


# Mama di Deepak y Satish ta contento cu e tin su tres yiunan back hunto cune



**ORANJESTAD (AAN):** Ayera mainta tur medio di prensa local y internacional tabata pendiente di resultado di tratamento di posibel prolongacion di detencion, of libertad di e sospechosonan den e caso di desaparicion di Natalee Holloway. Mama di e sospechosonan Deepak y Satish Kalpoe tabata den cercania di corte tambe, pendiente di e resultado y pa haya chens di wak su yiunan. DIARIO a combersa cune prome y despues cu huez a dicidi di laga nan den libertad. Prome cu huez a tuma su decision, e mama a bisa cu e tabata tin hopi fe cu su yiunan lo worde laga den libertad. El a splica cu el a haya oportunidad solamente un biaha, pa wak su yiunan, unda cu despues el a purba na diferente ocasion, sinembargo esaki a resulta di ta hopi dificil. Durante mey ora cu e tabata tin pa papia cu su yiunan, el a bisa cu nan tabata basta trankil y cu tur confianza cu nan lo worde laga den libertad, pasobra nan ta

inocente. E mama a bisa tambe cu e conoce su yiunan y el a sinti berdaderamente, mirando nan reaccion, cu nan tabata inocente. Te asta tabata tin momento cu nan por a hari, pues nan tabata tin tur confianza cu nan lo a sali. Segun e mama, su yiunan cu gusta come "Junk Food" a perde basta peso durante di nan detencion si. E yiunan a splike cu berdaderamente nan a duna Joran y e mucha muher un lift pa beach y nan no sa kico a pasa despues di esaki. El a bisa tambe cu e hecho cu nan a gaña ta algo di mucha, cu a bira nervioso. Nan no tabata sa cu e caso lo a bira asina grandi. E señora a bisa cu tur hende sa gaña den bida, sinembargo su yiunan a gaña quizas na un momento robez, sin sa e consecuencianan cu lo a sigui. Segun e mama, Deepak tabata haciendo un examen special, pa bay studia na Merca, mientras cu Satish tabata den 4de HAVO, sinembargo el a perde su ultimo C.P pa motibo di su

detencion, - pues probablemente e lo bay keda sinta. Despues cu e noticia a sali afo cu e rumannan a haya nan libertad, DIARIO a bay na cas di famia Kalpoe na Hooiberg, unda cu a combersa un biaha mas cu e mama, kende tambe a tende e bon noticia di libertad di su yiunan. Un cantidad di miembro di prensa internacional tambe a rondona e mama, unda cu el a splica cu e tabata sumamente contento, pero e no tabata sa exactamente ki ora nan lo yega cas. El a bisa tambe cu e no por expresa con contento e tabata y cu e tin hopi gana di brazanan. A puntra e mama si e famia tin intencion di tuma un vakantie, unda cu e mama a bisa cu esaki no ta e caso. E intencion ta pa su yiunan relax na cas, pa nan recupera, despues di e tempo dificil cu nan a pasa aden. Segun e mama, henter e famia durante di e periodo cu su yiunan tabata cera, a haya nan falta y no tabata come bon.

El a splica cu ora cu su yiunan ta na cas, su porta di camber ta cera, mientras cu ora cu su yiunan no ta na cas, su porta ta habri. El a splica cu Diadomingo anochi e tabata hopi inquieto y ora cu el a spierta marduga, un biaha mas el a realiza cu su porta ta habri y cu su yiunan no ta na cas y el a sinti hopi tristo. Un preocupacion cu e tin awor ta e echo cu el a tende cu e auto di su yiu cu ta den man di polis, no a worde trata hopi bon, durante cu nan tabata busca evidencia. Segun sra Ramirez, Deepak a inverti hopi placa den su auto

cu e gusta asina hopi, cu e ta bisa cu e auto ta su casa. Intencion di Deepak tabata pa bende e auto, pa e por haya placa, pa sikiera paga e prome aña di su estudio na Merca, cu lo costa hopi placa. Segun su mama, Deepak a spaar placa, pa asina paga pa su mama bay hunto cune riba un vakantie pa Surinam, pa wak nan famia cu nan tin 4 aña sin wak. Al final, e mama a bisa cu e ta contento cu e por sigui cana cara ariba, orguyoso di su yiunan cu no a comete ningun crimen.